

ՀԱՅԱՍՏԱՆՈՒՄ ԱՐԺԵՔԱՅԻՆ ԿՈՂՄՆՈՐՈՇՈՒՄՆԵՐԻ ԱԶԴԵՑՈՒԹՅՈՒՆԸ ՀԱՆՐԱՅԻՆ ԿԱՊԻՏԱԼԻ ՁԵՎԱՎՈՐՄԱՆ ԳՈՐԾԸՆԹԱՅԻՆ

Ադասի Թադևոսյան

Աշխատանքը վերաբերում է Հայաստանի Հանրապետության անցումային շրջանի առանցքային հիմնախնդիրներից մեկի՝ արժեքային կողմնորոշումների և այդ ոլորտում առկա գործընթացների վերլուծությանը: Ներկայացվում են արժեքային կողմնորոշումներում և արժեքներում ընթացող խմբակայնացման գործընթացների բնույթը և դրա ազդեցությունը ինչպես երկրի մարդկային ներուժի ստեղծագործական կարողությունների բացահայտման, դրսևորման ու իրացման միջավայրի ձևավորման, այնպես էլ պետության զարգացման հիմնախնդիրների վրա: Հիմնարար նշանակություն է տրվում զարգացման համար արմատական դեր ունեցող հանրային կապիտալի ձևավորման վրա արժեքների ոլորտում տեղի ունեցող փոխակերպումների ազդեցության առանձնահատկությունների ներկայացմանը: Աշխատանքի վերջում արվում են եզրակացություններ ու առաջարկներ՝ արժեքային ոլորտում պետական և հանրային զարգացման համար նպաստավոր քաղաքականության մշակման հիմնախնդիրների վերաբերյալ:

Ներածության փոխարեն

Հայաստանում անկախությունից ի վեր ձևավորված արժեքային կողմնորոշումներն ու միտումները վերլուծելու համար՝ անհրաժեշտ է հստակեցնել *արժեք* եզրույթի մեր մոտեցումը: Մշակութաբանության, սոցիալական մարդաբանության և հասարակագիտության մեջ դրա շուրջ կան բազմազան, հաճախ նույնիսկ իրարամերժ մոտեցումներ: Դրանց առանձին չանդրադառնալով, մենք պարզապես կներկայացնենք այս հոդվածում որպես ելակետային ընդունվող տեսակետը: Ըստ այդմ, *արժեքի* տակ հասկացվում են *այն սոցիալ-մշակութային երևույթները, որոնք նպաստում են հասարակության յուրաքանչյուր անդամի ստեղծագործական ներուժի բացահայտմանը, դրսևորմանը, զարգացմանն ու իրացմանը և հասարակական համակեցությունում ներդաշնակության ձևավորմանն ու դինամիկ վերարտադրությանը*: Արժեքի ներկայացված ձևակերպումն ունի կառուցողական (կոնստրուկտիվ) բովանդակություն: Սակայն մեր դաշտային աշխատանքները թույլ են տալիս պնդելու, որ հանրային կյանքում դերակատարություն ունեն նաև այնպիսի սոցիալ-մշակութային երևույթներ, որոնք կառուցողական չեն և անհատի

գարգացման առումով ունեն անկումային (դեպրեսիվ) և հետընթացային (ռեգրեսիվ) դերակատարություն: Որքան էլ առաջին հայացքից տարօրինակ կարող է թվալ, դրանցից շատերը հանրային ընկալման մեջ գնահատվում են նաև որպես արժեքներ և խմբակային հոգեբանությամբ բնորոշվող միջավայրերում համախմբման գործառույթ են իրականացնում: Այսպիսի երևույթները նկատելի են հատկապես խմբակային ինքնակազմակերպմամբ բնութագրվող կարծրատիպային (ստերեոտիպային) միջավայրերում, որտեղ անհատի դերը հիմնականում սահմանափակվում է ուղղահայաց իշխանություն ունեցող վերնախավային խմբերի ենթամշակույթի պարզ վերարտադրությամբ¹: Նման երևույթները ճիշտ կլինի բնորոշել որպես *թվացյալ արժեքներ (պսևդոարժեքներ)*, քանի որ անհատի ու հանրույթի գարգացման առումով դրանք կառուցողական դեր չեն կատարում: Այսօր Հայաստանում *արժեքի* նշանակություն է տրվում նաև այնպիսի սոցիալ-մշակութային երևույթների, որոնք իրականում *թվացյալ արժեքներ* են:

Արժեք բառի իմաստաբանությունը (սեմանտիկան) դրական է. այս բառը չի կարող իր բնույթով բացասական դերակատարություն ունեցող երևույթներ նշել: Ուստի, *արժեք բառով կործանարար (դեստրուկտիվ) սոցիալ-մշակութային փաստերը նշելն, ինքնին, հայաստանյան հանրույթի արժեքային իրավիճակը ներկայացնող լեզվամշակութային խոսուն փաստ է*:

Վերլուծությունն իրականացնելու համար պայմանականորեն կառանձնացնենք երկու հասկացություն՝ *կառուցողական (կոնստրուկտիվ) արժեքներ* և *կործանարար (դեստրուկտիվ) արժեքներ*: Առաջինի տակ նկատի են առնվելու այն սոցիալ-մշակութային երևույթները, որոնք համապատասխանում են մեր կողմից ձևակերպված *արժեք*, երկրորդի տակ՝ *թվացյալ արժեք* հասկացություններին:

Գործառույթային (ֆունկցիոնալ) առումով՝ թե՛ *արժեքները* և թե՛ *թվացյալ արժեքները* իրականացնում են հայ հանրույթի համակեցությունը կազմակերպող և վերարտադրող գործառույթ: Սա հիմնական պատճառներից մեկն է, որ *արժեքն* ու *թվացյալ արժեքը* հաճախ նույնացվում են միևնույն՝ *արժեք* հասկացության ներքո: Հայաստանյան իրականությունում նման մոտեցման ձևավորման համար հիմք է ծառայում նաև այն, որ դրական գնահատական է տրվում սոցիալ-մշակութային երևույթի

¹ Պարզ վերարտադրություն եզրույթի տակ այստեղ հասկացվում է վերարտադրության այնպիսի ձևը, երբ քանակական ու որակական առումներով՝ աճի տեմպերն անփոփոխ են:

կազմակերպչական և վերարտադրողական գործառնություն, իսկ մարդու և հանրության ստեղծագործական զարգացման գործունե անտեսվում է:

Կարևոր է նաև արժեք և արժեքային ընկալումներ հասկացությունների տարանջատումը: Արժեքային ընկալումներ ձևակերպման տակ մենք հասկանում ենք արժեքների ու դրանց վերարտադրության մասին հասարակական գիտելիքները, գնահատման չափանիշները և ձևերը՝ իրենց ներքին (կոնտեքստուալ) փոխկապվածության մեջ [1]:

Հոդվածում բարձրացվող էլակետային հարցադրումն է՝ արդյո՞ք արժեքային համակարգում հիմնարար արժեքը մարդն է, իսկ գերակայությունը՝ այդ հիմնարար արժեքի պահպանման ու վերարտադրության համար բարենպաստ պայմանների ձևավորման ընդհանուր նպատակադրվածությունն ունեցող, համագործակցության ու համերաշխության սկզբունքով առաջնորդվող հանրային համակեցության ձևավորումը: Թե՞ գերակայությունը պետք է կատարվի մարդկանց՝ միմյանցից և հասարակական կյանքից օտարման աստիճանի տարանջատող անհատի անսահման ազատականության արժևորման վրա: Մա կարևոր հարցադրում է, քանի որ դրա վիճարկումն այսօր թերևս առավել առանցքայիններից է աշխարհում: Այսինքն, ո՞րն է գերակայությունը՝ անհատի ազատությունը, թե՞ հանրային համակեցությունը: Այս հարցադրումը մեզ համար ևս առանցքային է այն պատճառով, որ վերջին տարիներին տեղափոխվում է նաև մեր հասարակություն:

Ներկայացված հարցադրումն ինքնին ծայրահեղականացված է, ինչը բխում է հարցադրման հիմքում դրված «կա՛մ-կա՛մ» սկզբունքից: Ընտրության դեպքում կարելի է հանգել երկու հավանական արդյունքի՝ կա՛մ անհատական կյանքի ծայրահեղ ազատականացման, կա՛մ հասարակական-քաղաքական համակարգի գերիշխանության:

Նշված խնդրի քննարկումը կարևոր է նաև այն պատճառով, որ Հայաստանի առջև կանգնած է զարգացման ուղու ընտրության հարցը, որի պատասխանն արժեքային տեսանկյունից դեռ հստակ չի տրվել:

Հայաստանն ունի ընտրության առնվազն երկու տարբերակ՝

- նշված «կա՛մ-կա՛մ»-ի բևեռներից որևէ մեկը,
- մերժել այդ մոտեցումը և գտնել զարգացման նոր՝ ուրույն ուղի:

Մա, թերևս ամենից առանցքային հարցն է, որի շուրջ, ցավոք, լայն հասարակական քննարկումներ չեն կազմակերպվում:

Մեր կարծիքով, արդի արժեքային գործընթացների գնահատման համար հիմնական չափանիշն այն է, թե, առանձին վերցրած, մարդը Հայաստանում որքանո՞վ է հնարավորություն ստանում ստեղծագործորեն

ինքնաիրացվել և որքանո՞վ է հասարակական համակեցությունը անհատի ինքնաիրացման տեսանկյունից նպաստում ներդաշնակ միջավայրի ձևավորմանը: Եթե *անհատի ստեղծագործորեն իրացման և հասարակական համակեցության ներդաշնակության* հարցը գերակայություն չի համարվում, ապա վտանգվում են՝

- մի կողմից՝ մարդու ազատության խնդիրը, քանի որ ինքնագիտակցորեն ու ստեղծագործորեն իրացվելու հնարավորությունից զուրկ մարդը չի կարող ազատ լինել,
- և մյուս կողմից՝ հասարակական, ազգային համակեցության հնարավորությունը, քանի որ հասարակության կամ ազգի վերարտադրությունը հնարավոր չէ առանց մարդկանց ստեղծագործ և գիտակից մասնակցության:

Այսինքն, եթե հասարակական համակեցությունում չկա ներդաշնակության այնպիսի աստիճան, որտեղ *հասարակության յուրաքանչյուր անդամի ստեղծագործական ներուժի բացահայտումը, դրսևորումը, զարգացումն ու իրացումն են համարվում հասարակական համակեցության առանցքային արժեքային գերակայությունը և հասարակական-քաղաքական ինստիտուտների հիմնական խնդիրը, ապա նման միջավայրում վտանգված են թե՛ մարդու ազատությունը և թե՛ հանրային համակեցությունը:*

Ստեղծված իրավիճակում և պայմաններում, ինչպես մեր հասարակությունը, այնպես էլ պետությունը չունեն հստակ ձևակերպված և հանրայնորեն հավանության արժանացած այնպիսի գերակայություններ, որոնք ուղղված լինեն ո՛չ միայն *գոյատևման*, այլև՝ արժանապատվորեն ապրելու և զարգանալու խնդրին: Ազգերի և պետությունների գերխնդիրը դինամիկ ձևով վերարտադրվելն է՝ ստեղծագործորեն ինքնաիրացվելու միջոցով: Պատմությունը ցույց է տալիս, որ այս գերակայությունը կորցրած ազգերն ու պետությունները, անկախ իրենց ռազմական ուժից ու տնտեսական հզորությունից, այդ ուժն ու հզորությունը պայմանավորող *հավաքական կյանքի իմաստը* սպառելու պատճառով կործանվել կամ կախման մեջ ընկնելով՝ օգտագործվել են այլոց կողմից:

Չնայած Հայաստանի անկախացումից անցել է 12 տարի, դեռ ուշ չէ վերադառնալ դեպի սկիզբ ու հարց տալ. *ինչպիսի՞ պետություն պետք է լինի ՀՀ-ը իր քաղաքացիների համար՝ մի կողմից, և Սփյուռքի բազմամիլիոնանոց հայության համար՝ մյուս կողմից:* Այս հարցի պատասխանը մեր զարգացման առանցքային երաշխիքն է: Մյուս կարևոր հարցը՝ *ո՞րն է որպես պետություն ու ազգ մեր տեղը և դերն աշխարհում:* Այսինքն,

չնայած 12 տարիների բացթողմանը, մեր հարցադրումը դեռևս արդիական է մնում՝ ճշտորոշելու, թե.

1. ո՞րն է կամ որո՞նք են 1991թ. ձևավորված *Հայաստանի Հանրապետություն* պետության գործառույթ(ներ)ը մարդու, հասարակության և ազգի համար,
2. ո՞րն է կամ որո՞նք են 1991թ. ձևավորված *Հայաստանի Հանրապետություն* պետության գործառույթ(ներ)ն աշխարհում:

Առանց նշված ճշտորոշումների՝ մենք ի վիճակի չենք լինի որպես մարդ, հասարակություն և ազգ, 1991 թվականին ձևավորված անկախ Հայաստանի Հանրապետությունում արժևորել մեր կյանքի ու գործունեության իմաստը:

Արժեքները առանցքային դերակատարություն ունեն *հանրային կապիտալի* ձևավորման ու վերարտադրման գործում: Իսկ հանրային կապիտալն առանցքային կարևորություն ունի մարդու և հանրույթի զարգացման գործում: Առանց հանրային կապիտալի՝ մարդիկ ստիպված պետք է լինեին «ամեն անգամ հեծանիվ հորինել», իսկ հանրույթը՝ ամեն օր իր համար համակեցության կարգ վերահաստատել: Հանրային կապիտալը ներառում է մշակութային և հանրային կառուցողական արժեքները, և գործառութային առումով՝ նպատակաուղղված է հանրույթի համակեցության պայմանների ձևավորմանն ու վերարտադրմանը: Այն քարացած երևույթ չէ և վերարտադրության գործընթացում անընդհատ թարմացվում է կա՛մ նոր արժեքներով, կա՛մ հների վերանայման և նոր պայմաններին հարմարեցման միջոցով:

Հանրային կապիտալի մեկ այլ առանձնահատկությունն այն է, որ այն ձևավորվում է հանրույթի կառուցողական բնույթ ունեցող կայուն արժեքների հենքի վրա և ապահովում է հենց այդպիսի արժեքների հարաշարժ (դինամիկ) վերարտադրությունը: Եթե տվյալ հանրություն ինչ-որ կերպ վերանան սեփական կայուն արժեքները, ապա այն կգրկվի իր հանրային կապիտալից և կկորցնի իր ինքնությունությունը: Հետևաբար, հանրային կապիտալի կարևորագույն բաղկացուցիչներից են նրա վերարտադրության բաղադրիչները և դրանց գործառությունը պայմանավորող հաստատություններն ու մեխանիզմները:

1. Ավանդույթների հիմնահարցը արժեքային տեսանկյունից ազգային խմբակայնացման իրավիճակում

Հանրային կապիտալի կարևորագույն տարրերն են *կառուցողական ավանդույթները*²: Սրանք այն ավանդույթներն են, որոնք որպես ձևավորված և վերարտադրված փորձ՝ կարգավորիչ դեր են կատարում հանրության կյանքում մարդու արժեքների և հասարակական համագործակցության կազմակերպման ու վերարտադրության գործում:

Հայկական միջավայրում³ հանրային կապիտալի ոլորտում փոխակերպումները զգալի փոփոխությունների են ենթարկվել դեռևս խորհրդային ժամանակաշրջանում: Այս ժամանակաշրջանը, չնայած Հայաստանի և հայ ժողովրդի կյանքում ունեցած դրական դերակատարությանը, ունեցել է նաև բավականին լուրջ բացասական հետևանքներ: Մասնավորապես, խոսքը վերաբերում է համայնական ու հասարակական կյանքի կազմակերպման էթնոմշակութային ավանդույթների կազմալուծմանը: Անշուշտ, հարցն այն չէ, որ 19-րդ դարի վերջին և 20-րդ դարի սկզբին հասարակական կյանքի կազմակերպման ավանդույթները կարելի է այսօր արդիական համարել: Սակայն հասարակական ու համայնական կարգի կոմունիստական դոգմատիկ միաշափությունը և այլընտրանքի հանդեպ ծայրահեղ անհանդուրժողականությունը պարզապես այլափոխեցին մեր սոցիոնորմատիվ մշակույթի հիմնական առանցքային տարրերը, ինչի ամենից բացասական հետևանքը եղան սեփական, ավանդականի հիման վրա նորությունների ձևավորման առկա բարդությունները: Այսինքն՝ Հայաստանում այսօր հասարակական կյանքում ձևավորվել է մի իրավիճակ, երբ ողջ խորհրդայինն արժեզրկվել է, իսկ ազգային շատ ավանդույթներ փոխակերպման (մուտացիայի) են ենթարկվել խորհրդայինին պատվաստման հետևանքով և ազգային անվան տակ գործառվում են իրականում անբնական ճանապարհով փոխակերպված տարրեր:

² Ավանդույթների վերաբերյալ այսօր հայաստանյան հասարակությունում, հատկապես երիտասարդության շրջանում ձևավորվում է թուր պատկերացում, ըստ որի դրանք նույնացվում են տիրազոր (ավտորիտար) դոգմաների ու կարծրատիպերի հետ՝ նպաստելով դրանց վերաբերյալ, որպես հետադիմականի, վելի ու ավելի արհամարհական վերաբերմունքի ձևավորման: Մակայն, մեր կարծիքով, դա սխալ մոտեցում է, քանի որ ավանդույթներում կան սոցիալ-մշակութային այնպիսի համընդհանրական (ունիվերսալ) փաստեր, որոնք իրենց կառուցողական բովանդակության շնորհիվ համամարդկայինի տարրն են ազգայինում: Այստեղ, որ համամարդկային ասելով մենք նկատի ունենք ոչ միայն ներկան, այլ նաև պատմականը:

³ Նույն վերլուծությունում հայկական եզրույթի տակ նկատի են առնվելու ներկայիս Հայաստանի Հանրապետության ազգային մշակութային տարածքին առնչվող երևույթները, ինչը պայմանավորված է մեզ համար հայկական Սփյուռքի իրողությունների արձանագրման ու հետազոտման փորձառական (էմպիրիկ) անմատչելիությամբ:

Սա ստեղծել է մի իրավիճակ, երբ նորությունների վերարտադրությունը Հայաստանում ընթանում է հիմնականում երկու ճանապարհով՝ կա՛մ օտար միջավայրից դրանց ներմուծման և գավառայնացման եղանակով տեղայնացման, կա՛մ խորհրդայինին պատվաստված ու աղավաղված ազգայինի հենքի վրա նույնքան աղավաղված նորությունների ձևավորմամբ:

Վերարտադրության գործընթացում ավանդույթի ու նորության միջև կապը թույլ է ո՛չ միայն քաղաքային, այլև՝ գյուղական մշակույթում: Ավելին, օտար միջավայրերից գյուղական մշակույթ նորությունների ներթափանցումը հաճախ տեղի է ունենում ուղղակիորեն⁴, այլ ոչ քաղաքային մշակույթի միջնորդավորման միջոցով, ինչի հետևանքով՝ գյուղական երիտասարդությունը արհամարհական վերաբերմունք է ձևավորում երրորդ սերնդի արժեքների նկատմամբ: Իսկ քանի որ ազգայինի տակ հասկացվում են հիմնականում երրորդ սերնդի արժեքները, ապա գյուղական երիտասարդության մեջ հաճախ ձևավորվում են ազգայինին հակադրվելու միտումներ: Հատկանշական է, որ հակադրումը հանգեցնում է ո՛չ միայն հասարակական կյանքում երրորդ սերնդի կարգավորիչ դերակատարության թուլացմանը, այլ նաև՝ ձևավորում գյուղերից երիտասարդության հեռանալու աճի միտումներ: Անշուշտ, դրանք ունեն նաև սոցիալ-տնտեսական պատճառներ՝ կապված գյուղատնտեսության ոլորտում առկա հիմնախնդիրների հետ: Սակայն հատկանշական է, որ երիտասարդությանը արտագաղթի մղող հիմնական դրդապատճառը ո՛չ միայն սոցիալ-տնտեսական, այլև՝ մշակութային իրավիճակն է⁵: Արժեքային տեսանկյունից չլինելով գրավիչ՝ ներկայիս գյուղական միջավայրը, անցումային շրջանում փոխակերպված և կործանարար գործառույթ ստացած արժեքների ազդեցությամբ ստեղծված իշխող տիրազոր (ավտորիտար) խմբակային իր մթնոլորտով, վանում է երիտասարդությանը, որն անհատի համար առավել ստեղծագործ և ազատ միջավայրերի է ձգտում:

Հասարակական տեսանկյունից՝ խորհրդային-ազգային արժեքներն ունեն խմբակային ու դոգմատիկ բնույթ: Դրանք հիմնականում «ձևով ազգային, բովանդակությամբ խորհրդային» կոմունիստական այն այլափոխումներն են, որոնք առավելապես դոգմատիկ բնույթ ունեցող ազգա-

⁴ Դրա պատճառը գյուղերից արտասահմանյան երկրներ արտագաղթի հետևանքով ռուսական ու արևմտաեվրոպական միջավայրի հետ ուղղակի կապերն են և այդ կապերի միջոցով նորությունների ուղղակի ներթափանցումը:

⁵ Նման դատողության հիմքը մեր կողմից հատկապես 1999-2003թթ. գրանցված դաշտային ազգագրական:

յինի կերպերին հարմարեցրել են նույնքան դոգմատիկ խորհրդային բովանդակություն: Այս պատվաստման հետևանքով ստացվել են խմբակային բնույթի կործանարար արժեքներ, որոնց աշխարհընկալման հիմքում ընկած է ոչ *թե յուրային – օտար հակադրամիասնությունը*, այլ *յուրային – թշնամի հակադրությունը*: Ստեղծված իրավիճակում՝ հասարակական կյանքում ազգայինի անվան տակ այսօր հիմնականում վերարտադրվում են խմբակային բնույթ ունեցող արժեքներ:

Որպեսզի ասվածը վերացական չթվա, բերենք մի քանի բնութագրական օրինակներ: Այսպես, օրինակ՝ *պատիվ, հարգանք, շնորհք* սոցիոնորմատիվ մշակույթի տարրերը հայկական ավանդական մշակույթում ունեին «լինել ո՛չ միայն ընտանիքին, այլ նաև համայնքին օգտակար մարդ» իմաստաբանությունը, որի համաձայն, հայկական սոցիոնորմատիվ մշակույթում, օրինակ, արհեստավորները պատվարժան մարդկանց շարքում ունեցել են առաջնային տեղ: Դրա հիմնական բացատրությունն այն է, որ «նրանք իրենց աշխատանքով ո՛չ միայն նյութական բարեկեցություն են ապահովել իրենց ընտանիքներին, այլ նաև օգտակար են եղել ողջ համայնքին՝ պատրաստելով համայնքի գյուղատնտեսական աշխատանքների համար անհրաժեշտ գործիքներ»: Այսինքն՝ *պատվի, հարգանքի, շնորհքի* վճռորոշ տարր է համարվել ինչպես մասնավոր բարեկեցություն ստեղծելը, այնպես էլ հանրօգուտ գործունեությունը:

Խորհրդային շրջանում *պատվի, հարգանքի, շնորհքի* ազգային բովանդակությունը փոխակերպվեց: Դրանց իմաստաբանությունում ներարկվեց առաջին հայացքից համարյա թե աննշան տարր: Դա ձևավորեց *պատվի, հարգանքի, շնորհքի* այն ընկալումը, որում առանցքային էր խորհրդային կարգին ու դրա տեղական ներկայացուցիչներին նվիրվածությունը: Այսինքն՝ դատապարտելի դարձավ մասնավոր շահը և գերակայելի՝ համակարգի շահը: Թվում էր, թե հասարակությունը և համակարգը նույնական են: Սակայն հասարակության խորհրդային համակարգի կողմից յուրային չհամարվող անդամներին ծառայելը կամ օգտակար լինելը ո՛չ միայն պատվաբեր չէր, այլև դատապարտելի էր: Այսինքն՝ պատվի ու հարգանքի արժանի էր համարվում նա, ով իր մասնավոր շահն ու հասարակական շահը պատրաստ էր ծառայեցնել կոմունիստական-խորհրդային վարչակարգի խմբակային շահերին: Թեկուզ միայն այս օրինակի վերլուծությունը ցույց է տալիս, որ խորհրդային ժամանակաշրջանում ազգային արժեքներում ներմուծված իմաստային այ-

լափոխումները ձևով ազգային արժեքներին և արժեքային ընկալումներին հաղորդեցին գլխավորապես խմբակային բնույթ⁶:

Խորհրդային խմբակայնության արտացոլումն անկախության շրջանի փոխակերպումներում ստացավ «պատվարժան է այն մարդը, ով հանուն հատվածական շահի՝ կարող է ստորադասել թե՛ մասնավորը և թե՛ հասարակականը» բովանդակությունը: Ըստ մեր հետազոտական նյութերի, այսօր հասարակական տարածում ունի հասարակականի, ազգայինի նկատմամբ մասնավոր շահի գերակայության թյուր ընկալումը: Դրա պատճառը հասարակությունում առկա գնահատման չափանիշներում մասնավորի ու հատվածական-խմբակայինի նույնականացումն է: Սակայն, իրականում, մասնավորն ու հատվածականը ո՛չ միայն նույնական չեն, այլև գտնվում են հակադիր շահերի բևեռներում: Հակառակ դեպքում՝ մասնավոր շահը չէր կարող այդ աստիճանի արհամարհված լինել ՀՀ-ում արտոնյալ ու ազդեցիկ դիրք գրավող խմբակային շրջանակների կողմից: Յուրաքանչյուր սեփականատեր, եթե ինտեգրված չէ այս կամ այն արտոնյալ ու ազդեցիկ խմբին, ապա նա, որպես սեփականատեր, լրջորեն վտանգում է իր գործունեության ու սեփականության վերարտադրման հնարավորությունները:

Ավելին, ազգային կերպերի ներքո խմբակային բովանդակության հարմարեցումը վտանգում է հենց ազգայինը, քանի որ ազգայինը չի կարող հատվածական ու խմբակային լինել: Հայոց սոցիոնորմատիվ մշակույթին ավելի խոր ծանոթացումը մեզ թույլ է տալիս ասել, որ այն, իր էությամբ, խմբակային չէ. այն հանրային բովանդակություն ունեցող մշակույթ է, որը հազեցած է եղել մասնավորի և համայնականի ներդաշնակությունն ապահովող հանրային կապիտալի կարևոր մասը հանդիսացող ազգային ավանդույթներով:

Եզրափակելով ազգային ավանդույթների՝ որպես հանրային կապիտալի բաղկացուցիչի, դերակատարությանը վերաբերող վերլուծության այս հատվածը՝ կցանկանայինք ասել, որ արժեքային փոխակերպումների ոլորտում առկա միտումների հարուցած առանցքային հիմնախնդիրը՝ *սոցիոնորմատիվ մշակույթի կերպերի բովանդակային խմբակայնացումն է, ինչը ավանդույթներին հաղորդում է դոգմատիկ և կործանարար բնույթ*: Այս գործընթացը նպաստավոր չէ նրանով, որ կարող է հասարա-

⁶ 1987-2003թթ. գրանցված դաշտային ազգագրական նյութերը, որպես փորձառական (Էմպիրիկ) հենք, նմանատիպ վերլուծությունների հնարավորություն են տալիս նաև շնորհք, հարգանք, հավատ, վստահություն և սոցիոնորմատիվ մշակույթի այլ բաղկացուցիչների վերաբերյալ:

կական հարաբերություններում, որպես հանրային կապիտալի բաղկացուցիչ, գործառնությունից զրկել (դեֆունկցիոնալիզացնել) ավանդույթը:

Ստեղծված իրավիճակում հուսալ, թե հնարավոր է պայքարել խմբակայնացման դեմ ինչ-որ արգելակիչ միջոցառումների միջոցով՝ անհրատեսական ու անիմաստ կլինի:

Խնդիրն ազգային ավանդույթների հիմքի վրա այնպիսի բովանդակություն կրող սոցիոնորմատիվ նորույթների ձևավորմանը նպաստելն է, որոնք ուղղված են մասնավորի ու հանրայինի ներդաշնակեցմանը: *Դրա իրականացման քաղաքական ուղին պետական ու ազգային մակարդակով խնդրի կարևորությունը գիտակցելու և ոլորտում հստակ քաղաքականություն մշակելու կամքի դրսևորումն է:* Այս ուղղությամբ առաջին քայլը կարող է լինել համապատասխան գիտական շրջանակներին՝ ազգագրագետներին, մշակութաբաններին և հասարակագետներին նպատակային պատվերներ իջեցնելը: Պատվերի նպատակը պետք է լինի ազգային ավանդույթների հենքի վրա մարդու հանրային կյանքն արժևորող ու ներդաշնակող կառուցողական արժեքների ու հասարակական կյանք դրանց ներդրման կոնկրետ առաջարկների մշակումն ու ներկայացումը: Ներկայումս մեր ազգային ավանդույթները, որպես հանրային կապիտալ, համարյա թե կորցրել են իրենց դերն ու գործառնություն և կառուցողական ավանդութային հենքի վերականգնումը, ինչը մեզ համար, որպես ազգային հանրության, ունի առանցքային կարևորություն: Այս հասարակական կապիտալը, որպես ազգայինն այլափոխող խմբակայինին այլընտրանք, հասարակական կյանք պետք է ներդնել կրթական համակարգում պետականորեն ուղղորդվող քաղաքականության միջոցով: Հանձինս վերը նշված մասնագիտական ունակությունները կրող գիտական ռեսուրսների՝ Հայաստանը նշված ծրագրի իրագործման ներուժը դեռևս ունի: Ուշացումը կարող է մեզ նաև դրա իրականացման ներկայիս հնարավորությունը ստեղծող ամենակարևոր մասնագիտական-գիտական ռեսուրսից էլ զրկել (նկատենք նաև, որ մասնագիտական-գիտական ռեսուրսը նույնպես մեր հանրային կապիտալի թերևս ամենից կարևոր բաղադրիչներից է, և դրա վերարտադրության ապահովման հիմնահարցը ինքնուրույն խնդիր է):

2. Ընտանիքը և սոցիոնորմատիվ մշակույթը որպես հանրային կապիտալ: Խմբակային արժեքների քրեականացումն ու հանցագործության (կրիմինալի) ազգայնացումը

Հանրային կապիտալի մեկ այլ առանցքային բաղադրիչ ընտանիքի ինստիտուտն է: Աշխարհում, մասնավորապես Արևմուտքում, հասարակական ինստիտուտների արդիականացման գործընթացները (որոնք հիմնականում տանում են այդ ինստիտուտի դերի նվազեցմանը), այսպես թե այնպես, մուտք են գործում նաև Հայաստան: Ընտանիքի հիմնախնդիրը դարձել է քննարկման առարկա ինչպես գիտական շրջանակների, այնպես էլ հիմնականում միջազգային կառույցների դրամաշնորհներով գործող տարբեր հասարակական կազմակերպությունների կողմից [2-4]: ՀՀ են մուտք գործում սեռերի սոցիալական դերերը կարգավորող սոցիոմշակութային նորույթներ, որոնցում առանցքային բաղադրիչը կնոջ սոցիալական դերի փոխակերպման հարցն է: Ըստ այդմ, գերակայությունը տրվում է կնոջ տնտեսական ինքնուրույնության խնդրին: Հատկապես քաղաքային երիտասարդության մեջ սկսում է աճել այն մտայնությունը, թե կինը պետք է առաջնահերթորեն կարևորի սեփական կյանքով ապրելու և տղամարդուց տնտեսական անկախություն ձեռք բերելու խնդիրը: Վերջինիս համեմատ ստորադաս կարևորություն է տրվում ընտանիք ունենալու, ամուսնանալու, մայրանալու ու երեխաներ դաստիարակելու խնդրին:

Արժևորման տեսանկյունից՝ քաղաքային միջավայրում նկատվում է *կին-մայր* սոցիալական դերի ստորադասման միտում *ազատ կին* սոցիալական դերին: Այս միտումը դեռևս չի մտել գյուղական միջավայր. ավելին, մեր դաշտային ազգագրական հետազոտությունները ցույց են տալիս, որ գյուղական միջավայրում վերջին 5-6 տարիներին նկատվում է հակառակ միտում՝ մոտ 2-3 տարով իջել է աղջիկների ամուսնական տարիքը: Շատ աղջիկներ գերադասում են ամուսնանալ դպրոցն ավարտելուց անմիջապես հետո: Արժեքային տեսանկյունից՝ հայկական գյուղը ընտանիքի և ամուսնության հարցում մնում է պահպանողական դիրքերում: Սակայն գյուղերում այս միտումը ժողովրդագրական առումով շոշափելի դրական ցուցանիշների չի հանգեցնում այն պատճառով, որ չափազանց մեծ է գյուղերից երիտասարդության արտահոսքը, ինչը գյուղերում բնական աճի անկման հիմնական պատճառն է: Իսկ գյուղական միջավայրից դուրս արդեն՝ ամուսնական տարիքը կտրուկ աճում է: Հատկանշական է, որ մարզային, քաղաքային բնակավայրերում, չնայած

հնարավորինս վաղ տարիքում ամուսնանալու աղջիկների ձգտմանը, տղաների սեռատարիքային համապատասխան խմբում նկատելի է հակառակ միտումը: Վերջինս բացատրվում է հայկական սոցիոնորմատիվ մշակույթում տղամարդու *ընտանիք պահելու* դերի իրականացման ներկա սոցիալ-տնտեսական պայմանների հարուցած դժվարություններով⁷: Ըստ մեր դիտարկումների, Երևան քաղաքում ներկայումս ամուսնական տարիքի վերին սահմանի աճի միտում է նկատվում:

Մի կողմից՝ ամուսնական տարիքում գտնվող տղաների սեռատարիքային խմբում սոցիալ-տնտեսական պատճառներով ամուսնությունից խուսափելու գործոնը, մյուս կողմից՝ նույն սեռատարիքային խմբից ժամանակավոր կամ մշտական արտագաղթի գործոնը, առաջացրել են ամուսնական տարիքի հասած տղաների պակաս⁸, ինչն էլ ձևավորում է ամուսնությունների թվի կրճատման միտում: Այսինքն՝ ստեղծված իրավիճակում, աղջիկների սեռատարիքային խմբում, նույնիսկ *ընտանիք* կազմելու ցանկության ու ձգտման դեպքում, առաջանում է դրա իրագործման դժվարություն: Ստեղծված իրավիճակում, բնականորեն, աղջիկներից շատերի մոտ ձևավորվում է *կին-մայր* սոցիալական դերի ստորադասում *ազատ կին* սոցիալական դերին: Փաստորեն, կնոջ սոցիալական դերին վերաբերող արժեքային այս փոխակերպումը հայաստանյան միջավայրում պայմանավորված է ո՛չ միայն արևմտյան սոցիոմշակութային նորույթների ազդեցությամբ, այլ նաև սեռատարիքային համապատասխան խմբերում տեղի ունեցող արդի ժողովրդագրական գործընթացներով:

Սակայն *ընտանիքի* ոլորտում ներկայացվածը հիմնական փոխակերպումը չէ: Կան մի շարք այլ առանցքային փոխակերպումներ: Մասնավորապես խոսքը վերաբերում է *ընտանիքի* հասարակական գործառույթի խնդրին: Վերջին տարիներին նկատվում է հասարակական համագործակցության համատեքստում *ընտանիքի* դերի նեղացման միտում: Դա պայմանավորված է հատկապես հասարակական համագործակցության մեջ գոյատևման հիմնահարցի գերակայությամբ: 1991 թվականից ի վեր Հայաստանը վեր է ածվել միմյանց հետ գոյատևման մրցավազքում մրցակցող *ընտանիքների* այնպիսի մի ամբողջության, որում հասարա-

⁷ Մեր կողմից գրանցված նյութերի համաձայն, շատ տղաներ խուսափում են ամուսնանալ՝ տղամարդու ընդունված սոցիալական դերից բխող ընտանեկան պատասխանատվությունն իրականացնելու հնարավոր անկարողության վախի պատճառով, նշելով. «Ինքս ինձ չեմ կարողանում պահել, ուր մնաց ամուսնանամ, ընտանիք պահեմ»:

⁸ Այս երևույթը հատկապես ակնառու է ՀՀ փոքր ու միջին քաղաքներում, որտեղ կանանց և տղամարդկանց հարաբերակցությունը, ըստ մեր գրանցած նյութերի, երբեմն մոտենում է 65% և 35%-ի:

կական կապերն առավելապես կրում են խմբակային բնույթ: Ընտանիքը, որպես հասարակական բջիջ, առավելապես իր գործունեության նպատակադրվածությունը կենտրոնացնելով գոյատևման հիմնախնդիրների լուծման վրա, հաճախ, հանուն այդ գերակայության, հակադրվում է հասարակական և պետական կարևորության արժեքներին՝ ստորադասելով դրանք իր գոյատևման հնարավորությունը երաշխավորող խմբակայինին: «Ընտանիք պահելու» գերակայության դիրքերից, հասարակական կարծիքը փաստորեն արդարացնում է հասարակական համագործակցությունը խարխլող այնպիսի երևույթներ, ինչպիսիք կաշառակերությունն ու կոռուպցիայի այլ դրսևորումներն են: Հարկ է նկատել, որ ընտրակաշառքների տարածումը, որոշ առումով, նույնպես պայմանավորված է ընտանիքի գոյատևման և դրա հասարակական գործառույթի նեղացմամբ: Ընտանիքն այսօր վերածվել է դրանում միավորված մարդկանց գոյատևման և ինքն իր վերարտադրության համար ամեն գնով երաշխիքներ ու պայմաններ ստեղծող միավորի: Չափազանց հազվադեպ է նկատվել, որ ընտանիքները, բացի նեղ ընտանեկան խնդիրներից, իրենց գործունեությունը նպատակաուղղեն թաղային, համայնական, հասարակական և ազգային խնդիրներին⁹: Այսինքն՝ ընտանիքը, որպես հանրային կապիտալի կարևորագույն տարր և վերարտադրողական օղակ, ներկա շրջանում աստիճանաբար կորցնում է իր հանրային գործառույթը և առավելապես խմբակայնանում է: Ավելի հստակ արտահայտվելով՝ *ընտանիքը, գործառության շրջանում լինելով հանրային սոցիոնորմատիվ մշակույթի վերարտադրության առանցքային օղակը, այսօր հիմնականում վերարտադրողն է հասարակական առումով կործանարար և բնույթով մեխանիկական խմբակային շրջանակների*¹⁰ [5] *նորմերի ու առավելապես կործանարար արժեքների, որոնք սխալմամբ ներկայացվում են որպես ազգային արժեքներ:*

Պատահական չենք օգտագործում համայնական եզրույթը: Համայնքը, ընտանիքի հետ միասին, եղել է հայկական սոցիոնորմատիվ մշակույթի և կառուցողական արժեքների վերարտադրությունն ապահովող հանրային կապիտալի կարևորագույն բաղադրիչը: Ինչպես խորհրդային, այնպես էլ հետխորհրդային շրջանում, գործառում են դրացիական համայնքի որոշ տարրեր: *Սակայն, քանի որ այս ոլորտում բացակայում է անհատի, ընտանիքի և հանրային ներդաշնակ համակեցու-*

⁹ Խոսքը վերաբերում է ինչպես գյուղական, այնպես էլ դրացիական համայնքին:

¹⁰ *Մեխանիկական* եզրույթն օգտագործվում է ստեղծագործականությունը և անհատականությունը մերժող խմբակային համագործակցությունը բնութագրելու տեսանկյունից, և նա, իր բովանդակությամբ, մոտ է է. Դյուրքեյմի կողմից այս եզրույթի տակ հասկացվող բովանդակությանը:

թյանը նպատակադրված պետական ուղղորդված քաղաքականությունը՝ մի կողմից, իսկ մյուս կողմից՝ սոցիոնորմատիվ ազգային մշակույթը խորհրդային և հետխորհրդային շրջանում այլափոխվելով վեր է ածվել խմբակայինի, որում ազդեցիկ դիրք է սկսում զբաղեցնել խմբակային տեսանկյունից առավել ինքնակազմակերպված ու ազդեցիկ, այսպես կոչված, «թաղային հեղինակությունների» ինստիտուտը, ներկայիս սոցիոնորմատիվ մշակույթը նույնպես գնալով ներծծվում է քրեական և քրեամերձ նորմերով, և ընտանիքն էլ, որպես սոցիոնորմատիվ մշակույթ վերարտադրող, վեր է ածվում հանցագործ որակի խմբակային սոցիոնորմատիվ մշակույթի կրողի: Ստեղծվել է մի իրավիճակ, երբ խմբակային նշված մշակույթը, ձեռք բերելով քրեամերձ բնույթ, համեմվում է ազգայինին և ներկայացվում որպես ազգային: Տարօրինակ է, որ ազգայինի հետ որևէ կապ չունեցող հանցագործ աշխարհին բնորոշ նորմերն այսօր հարմարեցվում են ազգային բարոյական այնպիսի առանցքային արժեքների, ինչպիսիք են *պատիվը, շնորհքը, հարգանքը, տղամարդկությունը* և այլն: Սա ստեղծում է ազգայինի և քրեականի տարօրինակ մի խառնուրդ, որը վտանգում է լցնել խորհրդահայ սոցիոնորմատիվ մշակույթի մերժումից հետո ստեղծված մշակութային դատարկ տարածքը: Սա մեր ազգային հանրային կապիտալի վերարտադրությանն սպառնացող լրջագույն վտանգ է, քանի որ կարող է ազգային սոցիոնորմատիվ մշակույթում նպաստավոր միջավայր ստեղծել քրեական նորմերի տարածման ու վերարտադրության համար՝ հայաստանցիներիս վերածելով քրեական արժեքներով և նորմերով ապրող ազգի¹¹: Սա կարող է սարսափելի հետևանքներ ունենալ: Սոցիալական վարքի հիմքում ընկած *պատիվ, շնորհք* և բարոյական այլ հասկացություններ երիտասարդության շրջանում այսօր կրում են քրեական բովանդակություն և խիստ հակադիր են ազգայինին: Հայ ազգայինն իր սոցիոնորմատիվ մշակույթում երբեք չի եղել քրեական արժեքների և բարոյականության ջատագովն ու վերարտադրողը: Առավել ևս՝ հայ ընտանիքը չի իրականացրել նման գործառույթ՝ իր դաստիարակչական բարոյական նորմերով:

Մեր բարձրացրած խնդրի տեսակետից՝ մենք ո՛չ թե ճգնաժամի շեմին ենք, այլ հենց ճգնաժամի մեջ ենք, քանի որ քրեական հակամշակույթը և թվացյալ արժեքներն արդեն ուղղորդում են ո՛չ միայն քաղաքային, այլև նույնիսկ գյուղական երիտասարդության սոցիալական վարքը: Այսօր

¹¹ Նման վիճակում ներկայումս հայտնվել են Լատինական Ամերիկայի որոշ երկրներ, որտեղ ազգաբնակչության ստվար հատվածը սպասարկում է թմրանյութերի ու մարմնավաճառության հանցագործ բիզնեսին:

այն ներթափանցում է նաև բուհական երիտասարդության միջավայր [6], այսինքն՝ կրթական համակարգ: Հանցագործությունը մուտք է գործել նաև մեր քաղաքական մշակույթ, և ընտրությունների շրջանում քրեական ու քրեականին հարող երիտասարդությունն է տոն տվողը ընտրատարածքներում, այսպես կոչված, «դաբրո» ունեցող թեկնածուների հաջողությունն ապահովելու գործում:

Ստեղծված իրավիճակում հիմնախնդիրն այն է, որ հասարակության առաջնային միավորներում՝ գյուղական ու դրացիական համայնական միջավայրերում ձևավորվել են, ժողովրդական լեզվով ասած՝ «վլաստ» (իշխանություն) ունեցողների քրեամետ խմբեր, որոնք վերահսկիչ դեր են ստանձնել արժեքների և համայնքում հարգի (պրեստիժային) դերերի ձևավորման ու վերարտադրության գործում: Լինելով խմբակային արժեքների կրողն ու վերարտադրողը՝ այս խումբը թաղային միջավայրերում, մասնավորապես երիտասարդության մեջ, կողմնորոշում է նաև անհատական արժեքների ձևավորումը:

Անցումային շրջանում գտնվող ՀՀ ներկայիս հասարակությունը, չունենալով ինքնակազմակերպման այլ կուռ կառույցներ, չի կարողանում ինքնուրույն դիմակայել այս քրեամերձ թաղային հեղինակությունների «վլաստին» և, վախի ազդեցության տակ, դառնում է դրանց կործանարար արժեքների ընդօրինակողը:

Քրեական-ազգայինի խառնուրդը ստեղծել է ազգայինի փոխակերպման մի անորոշ հեռանկար: Ստեղծված իրավիճակից դուրս գալու ելքը տեսականորեն բարդ չէ՝ ազգայինի հակադրումը և հակակշռումը քրեականին, այսինքն՝ թույլ չտալ քրեականին՝ խառնվել ազգայինի հետ և իր կործանարար արժեքներն ու նորմերը ներկայացնել ազգայինի կերպերի տակ: Այս առումով, հարկավոր է ազգայինի տակ ներկայացվող քրեական բարոյական ու սոցիալական նորմերին հակադրել ազգային ինքնագիտակցությունից բխող բարոյական ու սոցիալական այնպիսի նորմեր, որոնց նույնականացումը հայկականին դեռևս մարդկանց սոցիալական գիտակցությունում պահպանվում է. օրինակ՝ քրեականի *պատվի և շնորհքի*՝ «թասիբի» բարոյական նորմին հակադրել *պատվի և շնորհքի* ազգային նորմը: Եթե քրեական նորմերով խաբելու միջոցով մեկ այլ հայ մարդուն (նույնիսկ եթե նա հարևան է) շորթելը կամ՝ հասարակությունում տարածված արտահայտությամբ՝ «քցելը», համարվում է *շնորհք*, ապա ազգային բարոյական նորմերով դա համարվում է խիստ դատապարտելի, և հակառակը՝ *շնորհք* ու *պատիվ* է համարվում «խոսքի տեր լինելը»:

Ի դեպ, ազգային ավանդությանը շատ ավելի խոր հիմքեր ունի մարդկանց արխետիպային կամ ենթագիտակցական մտածողության մեջ, քան թաղային համայնքներում գերիշխանություն հաստատած քրեականը [7]:

Նշված քաղաքականությունն իրականացնելու համար անհրաժեշտ է առնվազն մի քանի պայման.

ա. ազգագրական դաշտային և լաբորատոր աշխատանքների իրագործում՝ երեք նպատակով.

1. սոցիոնորմատիվ մշակույթի ազգային տարրերի վերամշակման,
2. ազգայինում քրեականի ներթափանցման աստիճանի, ձևերի ու դրսևորումների բացահայտման ու վերլուծության,
3. քրեականի կործանարար արժեքներին ու նորմերին ազգային կառուցողական հակակշիռների, դրանք հասարակական կյանք ներդնելու մեխանիզմների ու քաղաքականության առաջարկների մշակման,

բ. պետական իշխանության քաղաքական կամքը՝ ուղղված հասարակական կյանք ներթափանցած քրեականի դեմ պետականորեն ազգային շարժում նախաձեռնելուն և այդ ճանապարհով *ազգային սոցիոնորմատիվ մշակույթի՝ որպես պետականության զարգացման և ազգային անվտանգության ամրապնդման համար անհրաժեշտ հանրային կապիտալի առանցքային բաղադրիչի վերականգմանը:*

Վերադառնալով ընտանիքի՝ որպես հանրային կապիտալի հիմնարար տարրի, կարևորության խնդրին, նկատել տանք, որ սոցիոնորմատիվ մշակույթի խմբակայնացումը, քրեականացումը և դրա միախառնման գործընթացը ազգայինին՝ ուղղակիորեն անդրադարձել են հայկական ընտանիքի ամրության վրա: Ինչպես արդեն վերը նկատեցինք, նշված սոցիոնորմատիվ մշակույթի մղումն իր արմատներով գնում է դեպի գոյատևման հիմնախնդիր: Իսկ քանի որ գոյատևման հիմնախնդիրների լուծման ժամանակ առաջացող բախումներից դուրս գալը կարգավորվում է գլխավորապես քրեական-ազգային խմբակային նորմերով, ապա, հատկապես տղամարդիկ, մասամբ նաև այն կանայք, ովքեր իրենք են հոգում ընտանիքի գոյատևման հիմնախնդիրը, ստիպված են, առանց խորապես գիտակցելու, ընդօրինակել և կիրառել նշված որակների խմբակային նորմերը՝ դառնալով դրանց կրողն ու ամենօրյա վերարտադրողը մի կողմից՝ հասարակությունում, մյուս կողմից՝ ընտանիքում: Հատկապես այն ընտանիքները, որոնք ներքաշված են գոյա-

տևման մրցապայքար¹², նշված սոցիոնորմատիվ մշակույթի վերարտադրողներն են ընտանիքներում: Այսինքն՝ այս ընտանիքներում երեխաների դաստիարակությունն իրականացվում է ներկայացված ոգով: Մյուս կողմից՝ այս ընտանիքներում սկսում են տարածվել նաև հայկական սոցիոնորմատիվ մշակույթի համար խորթ ու անսովոր ընտանեկան բոնությունների դեպքերը: Ներկայացված խմբակային և քրեական-ազգային նորմերը լքողներն խաթարում են նաև տղամարդու և կնոջ սոցիալական դերին վերաբերող պատկերացումները և ընդհանրապես բացասաբար անդրադառնում ներընտանեկան հարաբերությունների էթիկայի նորմերի վրա: Իր հերթին, սա խաբիլում է ընտանեկան բարոյականության հիմքերը և նպաստում հայկական ընտանիքի նոր, վերոնշյալ խմբակային նորմերից բխող մոդելի ձևավորմանը, որտեղ սեռերի փոխհարաբերություններն ու գերակայությունը (դոմինանտությունը) կառուցվում են ոչ թե ընտանեկան կյանքում սեռերի սոցիալական դերի նկատմամբ եղած հարգանքի, այլ՝ ուժի և ֆինանսական ազդեցության գործոնի հիման վրա: Ընտանեկան էթիկայի նորմերի փոխակերպումը հանգեցնում է ընտանեկան հարաբերությունների թուլացմանը, բոնությունների աճին: Հատկանշական է, որ ըստ մեր դաշտային հետազոտությունների և այս ոլորտում իրականացված այլ հետազոտությունների՝ ընտանեկան բոնությունների աճ է նկատվում հատկապես հարբեցող, թմրանյութերի դիմող և քրեամետ, ժողովրդական լեզվով ասած՝ «ռաբիզ» ու «գողական» ոճի, կործանարար արժեքային միջավայրերին հարող տղամարդկանց ընտանիքներում [8]:

Նկատելի է մեկ այլ միտում ևս. դա ընտանիքի՝ որպես հասարակական հաստատության, և հանրային կապիտալի դերի ընկալման անկումն է հասարակությունում և երիտասարդության մեջ. հատկապես կրթական և մասնագիտական բարձր որակավորում ունեցող աղջիկների շրջանում առկա է ամուսնության նկատմամբ բացասական միտում, որը նպաստում է նաև վերոնշյալ *կին-մայր* և *ազատ կին* սոցիալական դերերի մեջ հակասության խորացմանը, այլ ոչ դրանց ներդաշնակեցմանը: Այսինքն՝ Հայաստանի հասարակության սոցիոնորմատիվ մշակույթի խմբակայնացումը, քրեականացումը և վերջինիս՝ ազգայինի ներքո ներկայացումը բացասաբար է անդրադառնում հանրային ամենակարևոր կապիտալի՝ ընտանիքի ինստիտուտի վրա, մի կողմից՝ քայքայելով այն

¹² Իսկ այդպիսիք ՀՀ-ում կազմում են մեծամասնություն՝ ինքնազբաղվածների, մանր ու միջին ձեռներեցությամբ զբաղվածների հիմնական մասը: Ըստ որոշ հետազոտությունների՝ գոյատևման մրցապայքարում ներքաշվածները կազմում են բնակչության տեսակարար կշիռ 80 տոկոսից ավելին:

ներքուստ, մյուս կողմից՝ վնասելով ընտանիքի՝ որպես հանրային ինստիտուտի, ձևավորման ու վերարտադրության գործընթացին:

Նշված բացասական գործընթացների կանխման ուղին, ինչպես վերնասվեց, սեփական ազգային սոցիոնորմատիվ մշակույթի հիման վրա կառուցողական հակակշիռների ձևավորումը, դրանք հասարակական կյանքում ներդնելն ու այդ ուղղությամբ պետականորեն ծրագրված քաղաքականության իրականացումն է:

Ամփոփում

Վերը ներկայացված վերլուծությունը ցույց է տալիս, որ արժեքների խմբականացումը և ազգայինի աստիճանական քրեականացումը խարխալում են ինչպես մակրոմակարդակի ինստիտուտները՝ ընդհուպ մինչև պետությունը, այնպես էլ միկրոմակարդակի հասարակական ինստիտուտները՝ ընդհուպ մինչև ընտանիքը: Մա լրջագույն ահազանգ է հասարակության և պետության համար: Հուսալ, թե ինքն իրեն ամեն ինչ կկարգավորվի՝ սխալ է: Ճիշտ չէ նաև այն մոտեցումը, թե արժեքային ճգնաժամը, որն աստիճանաբար թուլացնում է մեր ազգային ու պետական վերարտադրության համար առանցքային կարևորություն ունեցող հանրային կապիտալը, արտաքին ուժերի, մասնավորապես արևմտյան արդի քաղաքակրթության կողմից տարվող քաղաքականության, մասնավորապես համաշխարհայնացման գործընթացների հետևանքն է: Համաշխարհայնացումը (գլոբալիզացիան) փաստ է, և դրան ՀՀ-ի նման պետությունը եթե նույնիսկ որոշի դիմակայել, չի կարող: Եթե մենք ինքներս չունենք պետական ու ազգային-մշակութային զարգացման ռազմավարություն, ո՛չ միայն համաշխարհայնացումը, այլև արտաքին ծագմամբ ամեն գործընթաց կարող է բացասաբար ազդել մեր պետական ու ազգային ինքնության վերարտադրության վրա: Հանրային կապիտալի պահպանման ու հարաշարժ (դինամիկ) վերարտադրության հիմնախնդիրը եթե պետական քաղաքականության ռազմավարության առաջնահերթություն չի համարվում՝ պետականության առկայության պայմաններում ստորադասվելով այլ խնդիրների, ապա այդ կապիտալը կարող է փոշիացվել: Այսինքն՝ այս հարցում պատճառները պետք է ո՛չ թե դրսում փնտրել, այլ՝ ներսում: Ներկայացվող վերլուծությունում մենք հանրային կապիտալի բոլոր բաղադրիչներին չենք կարողացել անդրադառնալ, սակայն առանցքայիններից մի քանիսի ներկա վիճակը փորձել ենք ներկայացնել և բարձրացրել ենք հիմնական ահազանգերը:

Դրանք մի քանիսն են.

I. Մարդու՝ որպես հանրային կապիտալի հիմնաքարային միավորի, արժեքի անտեսումը և հանրապետության մարդկային ռեսուրսների ինչպես ֆիզիկական (բնական աճ), այնպես էլ որակական վերարտադրության խնդիրները: Սրա պատճառը հիմնականում ներկայումս տարածվող խմբակային, քրեական կործանարար արժեքների գերիշխումն է, որում հանուն հատվածականության անտեսվում են ինչպես մարդը, այնպես էլ ազգայինն ու պետականը:

II. Ընտանիքի՝ որպես հանրային կապիտալի հասարակական ու ազգային առաջնային միավորի, կարևորության անտեսումը, ինչը նույնպես հանգեցրել է հասարակական այդ կարևորագույն ինստիտուտի վերարտադրության բարդությունների՝ հանրային-խմբակայինի ճնշման տակ ընտանեկան արժեքների խմբակայնացումն ու մարդու արժևորման տեսանկյունից կործանարարությունը:

III. Ազգային ինքնությունը և ազգային ինքնագիտակցությունը պայմանավորող, սեփական նորությունների ձևավորման համար անհրաժեշտ ազգային կառուցողական ավանդության ինքնի հեղինակագրկման միտումը՝ ազգային ավանդության նորմերի բովանդակության խմբակայնացման, որոշ դեպքերում՝ նաև քրեականացման ճանապարհով: Սրա հետևանքը, *ազգայինի ու մարդու, ազգայինի ու համամարդկայինի, ազգայինի ու ստեղծագործականի միջև* խորացող անջրպետն է: Վերջինս ազգային արժեքներին հաղորդում է կործանարար բնույթ, քանի որ գերիշխող են դառնում անհատի ստեղծագործական ազատությունը կաշկանդող դոգմատիզմը և տիրագործությունը (ավտորիտարիզմը): Դա նկատելի է ինչպես հասարակական, քաղաքական, տնտեսական, այնպես էլ մշակութային կյանքում: Ազգայինի խմբակայնացումն աստիճանաբար օտարում է ստեղծագործական ներուժ ունեցող անհատներին ազգային մշակույթի կարևոր բաղադրիչից՝ ավանդույթներից ու դրանց վերարտադրության գործընթացից: Ավանդույթի ստեղծագործական վերարտադրության հիմնական պայմաններից մեկը դրա խմբակայնեցմանն ու քրեականացմանը հակակշռելու ստեղծագործական ներուժ ունեցող դերակատարների խթանումն է, այսինքն՝ վերարտադրության գործընթացներում ստեղծագործ անհատների ու շրջանակների ներգրավմանը նպաստող պետական ու ազգային քաղաքականության որդեգրումը: Առավել գործնական՝ հայկական ֆինանսական կապիտալի հիման վրա այնպիսի գիտակրթական ու մշակութային ֆոնդերի ձևավորումը, որոնք կարող են ՀՀ-ում առկա գիտակրթական ու մշակութային

մարդկային ներուժի գործունեությունն ակտիվացնելու ֆինանսական հիմքեր ստեղծել և այդ միջոցով նպաստավոր պայմաններ ձևավորել պետական ու հասարակական կյանքում կառուցողական արժեքների «արտադրության» համար: *Ազգայինում ստեղծագործական ներուժի գործունեության խթանումը՝ սեփական դեմքը և ոգին վերարտադրելով տնտեսապես զարգանալու լավագույն ելքն է:*

IV. Պետության, պետական ինստիտուտների ու խորհրդանիշների, որպես մարդու ստեղծագործորեն ապրելու ու վերարտադրվելու երաշխիքի արժեզրկումը: Հենց այս հարցում է, որ պետությունը՝ որպես հանրային կապիտալ, մարդկանց կյանքում կորցրել է իր արժեքը: Այն մեծ մասամբ գնահատվում է որպես կաշկանդող, քան խթանող հաստատություն: Անհրաժեշտ է մարդու, հասարակության և ազգի առումով պետական ռազմավարության հստակեցումը, որպեսզի *Հայաստանի Հանրապետությունը դառնա այնպիսի պետություն, որտեղ առանձին վերցրած յուրաքանչյուր հայաստանցի և հայ մարդ կունենա իր ունակությունները բացահայտելու, զարգացնելու և ստեղծագործորեն իրացնելու հավասար հնարավորություններ: Յուրաքանչյուրի բարգավաճման հնարավորությունների ու պայմանների ձևավորումն ու երաշխավորումը պետության հիմնական խնդիրն է ներքին ու արտաքին քաղաքական առումներով: Այսինքն՝ պետության հիմնական ռազմավարական նպատակը պետք է լինի այնպիսի միջավայրի ձևավորումը, որը նպաստավոր ու բոլորի համար հավասար հնարավորություններ ու պայմաններ կստեղծի մարդկային կապիտալի (ունակությունների ու ֆինանսների ձևով) ձևավորման և այն հասարակական, քաղաքական, տնտեսական, մշակութային և այլ ոլորտներում շրջանառության մեջ դնելու համար: Կարծում ենք՝ սա, մի կողմից, պետության՝ որպես հանրային կապիտալի արժևորման և, մյուս կողմից՝ պետությունը խմբակային արժեքից հանրայինի վերածելու հիմնական երաշխիքն է:*

Աղբյուրներ և գրականություն

1. Թադևոսյան Ա., Արժեքային գործընթացներն ու միտումները Հայաստանում, Երևան, 1998:
2. Ընտանիքի հետազոտման հիմնախնդիրները, հոդվածների ժողովածու, Երևան, 2001:
3. Կանայք հայոց նոր դարի շեմին, Երևան, 2000:
4. Զեկույց կանանց իրավիճակի մասին. անցումային շրջանի ազդեցությունը,

Երևան, 1999:

5. Дюркгейм Э., О разделении общественного труда, М., 1996, с. 189.
6. Մարտիրոսյան Ա., Ուսանողության խնդիրները միայն սոցիալական բնույթի չեն, Տեսակետ, Երևան, 2003, թիվ 12, էջ 24:
7. Platz S., Society, Nation, State: Ethnographic Perspectives on Armenia - State Building and the Reconstruction of Shattered Societies (Conference Report), University of California, Berkeley, 1999, p. 10.
8. Թադևոսյան Ա., Գաբրիելյան Մ., Աղքատության ու գոյատևման պատկերը. հասարակության շերտավորման գործընթացները Հայաստանի Հանրապետությունում, Երևան, 2003, էջ 116:
9. Ընտանեկան բնությունները Հայաստանում. սոցիոլոգիական հետազոտություն, Երևան, 2002, էջ 48:

17 մարտի, 2004թ.

ВЛИЯНИЕ ЦЕННОСТНЫХ ОРИЕНТАЦИЙ НА ПРОЦЕСС ФОРМИРОВАНИЯ СОЦИАЛЬНОГО КАПИТАЛА В АРМЕНИИ

Агаси Тадевосян

Резюме

Текущий переходный период относится не только к сферам экономической и политической жизни Армении, но и к ценностной сфере. После приобретения Арменией независимости, когда ценности советского периода потеряли свою актуальность, одной из первых прослеживаемых тенденций был переход ценностей из общественной сферы в область групповых интересов, которые в свою очередь столкнулись с личностными и общественными. Вместе с этим была замечена некоторая тенденция криминализации национальных ценностей и ценностных ориентаций. Вследствие подобных процессов, ценности могут приобрести деструктивное значение, тем самым угрожая основам социального капитала постсоветского армянского общества. Это относится к институтам как макро, так и микро уровней, от государства до семьи.

В данной ситуации разработка ценностной политики государства становится необходимым и неотложным делом, в котором основное значе-

ние должно уделяться стимуляции творческого потенциала. Основной ценностью разрабатываемой политики должен считаться человек, а приоритетом – создание общественно-политической среды, характеризующейся равными и благоприятными условиями для выявления и реализации творческих способностей человека.